

Ina gronda sfida ed ina trumpada

Bellezia relaziuns da concorrenza als campiunadis svizzers da cuorsa liunga a Sedrun/Rueras

Hans Huonder/FMR

L'emprema part dils campiunadis svizzers da cuorsa liunga 2021 a Sedrun/Rueras ein historia. Els ein stai signai dalla nevada e d'ina fetg buna participaziun. Buca tenor giavisch ein las cuorsas reussidas al matador local Cla-Ursin Nufer. Entochen ditg viaden el venderdis ha ei neviu sisum la Surselva. «Nus savevan buca sche nus sappien insumma porscher las cuorsas», di il caucorsa *Toni Cathomen*. Igl emprem han las grondas massas da neiv fatg quitaus als organisaturs, allura il prighel da lavinas: «Il venderdis encunter sera havein nus saviu che la via cantunala vegni aviarta, mo lu ei vegnida la novitad dallas autoritads communalas ch'ina eventuala lavina dalla Pulanera pericliteschi era ina part da nossa loipa.»

Lavur senza fin

Quella novitad ha giu per consequenza ch'ils organisaturs han stuiu midar il trassé dalla loipa. La part dadens igl ual dalla Val Mila ei staus serraus pervia dil prighel da lavinas. «Nus essan lu sedecidi pil tschancun da loipa vegl», di Toni Cathomen. Sin quella havevan ils clubs da skis Sedrun-Tujetsch e Trun giu organisau ils campiunadis svizzers igl onn 2013. Igl ei in tschancun cun ina lunghezza da 5 km. Per che quel seigi semtgaus la sonda endamaun pil trenament da rodund 150 curridras e curriders ha il maschinist *Reto Bearth* luvrau atras, empau era sin «camond» da sia dunna, la responsabla pil tschancun, *Monika Bearth*. Dalla sera allas 22.00 entochen las damaun allas 04.30 ei la loipa vegnida preparada aschia che las cundiziuns da cuorsa ein lu stadas optimalas. La sonda avonmiezdi ein las ulteriuras lavurs vegnidas fatgas. «Tuts involvi han prestau in'enorma lavur», constatescha Toni Cathomen. Fetg cuntents cun las relaziuns ch'ei sepresentadas la fin d'jamna – surtut era culla bellezi'aura la sonda - ei era il president dil comite d'organisaziun, Guido Friberg: «Las curridras ed ils curriders ein secapescha leds da mintga caschun da concorrenza ch'els han quest unviern. Quella caschun cheu havein nus exnum vuliu porscher ad els.» Spir compliments ei era il cau dils giuvenils tier Swiss Ski, *Edi Zihlmann*: «La preparaziun da quella infrastruttura suenter quella massa neiv ha pretendiu gronds sforzs. Jeu tilel buca ina, mobein treis capialas. Ina tala prestaziun san ins buca apprezzar avunda.»

Bia neiv e leutier corona

Las grondas stentas dils organisaturs per saver arranschar quels campiunadis svizzers han denton entschiet ditg avon che la neiv ed il prighel da lavinas procurien per fastedis. Per saver porscher las cuorsas il temps da corona eis ei stau necessari da scaffir in concept da protecziun fetg detagliau. Aspectatur(a)s han buca astgau esser presents e tut ils ulteriurs – curridras, curriders, trenaders, accumpignaders, representants da medias ed organisaturs – han giu da risguardar claras mesiras da protecziun. Igl areal ei staus contonschibels sulettamein atras posts controllai e dapertut sin quels han ins viu sulettamein personas cun mascras. Il

responsabel pil concept e la controlla sil plaz, *Stefan Schwenke* constatescha: «Ina ga ni l'otra ha in emblidau da metter si mascrina, mo tut en tut ei la disciplina stada fetg buna.» La secunda part dil campinadi svizzer da cuorsa liunga a Sedrun-Rueras ha liug ils 26 entochen ils 28 da mars 2021. Las cuorsas dalla fin d'jamna han era quintau pil Swiss Cup.

Dunnas elita, U20, U18, 5 km: 1. Alina Meier, Tavau, 14.34,6; 2. Anja Weber, Am Bachtel, 14.49,2; 3. Desiree Steiner, Tavau, 14.57,3; 4. Lydia Hiernickel, Guardiacunfins, 15.00,4; 5. Nadja Kälin, S. Murezi, 15.94,0; 6. Siri Wigger, Am Bachtel, 15.09,2.

Umens U20, U18, 10 km: 1. Antonin Savary, Riaz, 25.12,0; 2. Jaume Pueyo, Spagna, 26.03,4. 3. Nicola Wigger, Am Bachtel, 26.03,5; 4. Fabrizio Albasini, S. Murezi, 26.06,4; 5. Cla-Ursin Nufer, Sedrun-Tujetsch, 26.08,9; 6. Niclas Steiger, Samedan, 26.15,0. Plinavon: 16. Fadri Schmid, Sedrun-Tujetsch, 27.18,9; 36. Jon-Fadri Nufer, Sedrun-Tujetsch, 28.31,3.

Umens elita, 15 km: 1. Jason Rüesch, Tavau, 36.30,8; 2. Dajan Danuser, Vättis, 36.44,0; 3. Livio Bieler, Guardiacunfins, 37.16,0; 4. Valerio Grond, Tavau, 37.26,2; 5. Marino Capelli, Tavau e Cedric Steiner, Tavau, 37.30,6.

Damas elita, U20, U18, 10 km: 1. Alina Meier, Tavau, 49.25,1; 2. Desiree Steiner, Tavau, 49.33,9; 3. Nadja Kälin, S. Murezi, 50.05,5; 4. Lydia Hiernickel, Guardiacunfins, 50.08,0; 5. Siri Wigger, Am Bachtel, 50.12,6; 6. Marina Kälin, S. Murezi 50.44,4.

Umens U20, 10 km: 1. Antonin Savary, Riaz, 56.01,5; 2. Nicola Wigger, Am Bachtel, 56.49,7; 3. Jaume Pueyo, Spagna, 56.51,4. 4. Niclas Steiger, Samedan, 56.52,1; 5. Pierrick Cottier, Im Fang, 56.54,5 6. Cla-Ursin Nufer, Sedrun-Tujetsch, 57.01,7. Plinavon: 26. Jon-Fadri Nufer, Sedrun-Tujetsch, 1.00.54,6.

Umens elita, 15 km: 1. Livio Bieler, Guardiacunfins, 1.20.02,5; 2. Cedric Steiner, Tavau, 1.20.42,1; 3. Marino Capelli, Tavau, 1.20.44,6; 4. Erwan Käser, Guardiacunfins, 1.20.55,8; 5. Ilya Chernousov, Lantsch, 1.21.12,7; 6. Cyril Fähndrich, Horw, 1.21.46,2.

«Il motor era buca caulds»

«La finamira fuva in plaz da podest», di *Cla-Ursin Nufer* ch'ei partius ella categoria U20. Il giuven Tuatschin ch'ei commember dil cader C da Swiss Ski ha saviu absolver il campinadi sin sia loipa da casa, mo ha la finfinala stuiu secuntentar cun rangs che han buca schau ascender el il podest: «Cunzun dalla cuorsa dalla sonda (stil liber) havevel jeu spitgau dapli. Mo enzaco era il motor buca caulds. Forsa haiel jeu fatg memia pauc ils davos dis per vegnir endretg sin turas.» In tec disletg ha lu era aunc accumpignau el la sonda: «Ei ha dau in incap cun mes skis da cuorsa, aschia ch'jeu haiel stuiu cuorer culs skis ch'jeu hai giu per sescaldar en.» La sonda han sulettamein tschun secundas muncau ad el per recaltgar la medaglia d'argien. Cun quei pign disavantatg eis el allura partius la dumengia avonmiezdi ella cuorsa da persecuziun, mo ils concurrents davontier han teniu el sin distanza. Il proxim impurtont termin ei il campinadi mundial da juniors en Finlanda. Ina rangaziun sut ils emprems diesch ei ina da sias grondas finamiras. Il cau dils giuvenils tier Swiss Ski, *Edi Zihlmann*, ei perschuadius che Cla-Ursin Nufer ha las habilitads da contonscher quella finamira. Campiuns svizzers dils umens ein dil reminent daventai *Jason Rüesch* da Tavau ella cuorsa dil stil liber e *Livio Bieler* dils Guardiacunfins ella cuorsa da persecuziun el stil classic. Tier las damas ha *Alina Meier*, medemamein da Tavau, gudignu omisduas cuorsas.



Il president dil comite d'organisaziun, Guido Friberg, ei fetg cuntents cul decuors dil campionadi.



Cla-Ursin Nufer ei buca cuntents cun sias prestaziuns. Tonaton eis el serangaus denter ils meglers da sia categoria.



Alina Meier da Tavau ei daventada campionesa svizra dubla.

FOTOS HANS HUONDER